


La Dolomites de Lego

La Risola la met a jir "Dolomites Lego" de Ermanno Zulian da Soraga che ensema a etres bec da Fascia l portarà a compiment n modelin de noscia val dut fat coi pìcoi cadrie de Lego

Joegn - Te l'ambit de la sezion "Cognoscer e se confrontèr col mond" di projec portè dant tel pian joegn de zona "La Risola" l'è rua l moment per i joegn de duta la val de se sproèr te na roba deldut desvaliva da chela che se è usé a fèr. Defat taca "Dolomites Lego", n projet de Ermanno Zulian da Soraga, n joegn diplomà al liceo scientific de Poza che l se à pissà de realisèr n "mega" plastich de presciapech 3 metres de duta la Val de Fascia en scèla 1:10.000 con 50 mille pìcoi cadrie de Lego. Se trata de ge jir dō al prospect su la chërta olache l'è segnà duta la morfologia de nosc teritorie: i monc, i ruves, la crepes, i bosc e i pèscoi. No vegnarà lascià fora nia e n'outa feni l plastich l vegnarà metù fora ti desvalives enc de Fascia desche i Comuns e l'Apt per fèr veder a na vida originèla e creativa noscia Dolomites Patrimonie Unesco.

La pruma scontrèda la sarà en mèrtesc ai 16 de aost te sala del Consei del Comun de Soraga da les 15.00 domesdi. Chi che tolarà pèrt se troarà trei dis en setemèna da les 15.00 a les 18.00, ma tel prum enconter se podarà se cordèr sui dis e sui oraries a na vida che i vae ben per duc i scric ite.

Per se scrìver ite l'è temp enscin en vender ai 12 de aost e l cost l'è demò de 20 euro. Se cogn desciarièr l formulèr de iscrizion dal sit www.larisola.com e l consegnèr te Comun general ti oraries de lurier o al portel de la Risola che l sarà avèrt demò en vender ai 12, ùltim dì de la enscinuaziòn, da les 16 a les 18. Chi che volessa n saer de



La riproduzion en 3D de n toch del modelin de Lego de noscia val.

più i pel vardèr sul sit o su la piata Facebook de la Risola, o scrìver na mail a la direzion pianogiovani. fassa@alice.it.

Nos endèna sion jic a cognoscer Ermanno Zulian che l ne à ja dit coche l'è nasciù e coche vegnarà portà inant l projet.

Co éla che t'è vegnù tel cef de portèr dant chest projet?

Ermanno Zulian: "Saon che da pech le Dolomiti é doventade Patrimonie Mondial de l'Unesco. A lejer i sfoes é sapù del Pian joegn de zona La Risola olache se podea portar projec che tole ite i joegn e coscita me é dit "Ma no se podessèl troar zeche per se far cognoscer de più no demò te la Talia ma ence a livel european e adertura mondial?" Me é pissà de realisèr n plastich de duta la Val de Fascia, ma no de carton-legn, che me someava na idea mingol banala. Me é pissà de durar zeche che cognosc duc e me é vegnù tel cef de durar l Lego, n

cadrel cognosciù a livel mondial e che cognosc tant i bec che i gregn."

Aeeste jà na pascion per i Lego?

"Ei, da canche ere picol, a ciasa é n ceston pien de Lego."

Peste me contèr mingol coche t'è fat a meter ensema dut l projet?

"É vardà l bando e son jìt da La Risola, dapò mingol a l'outa son stat bon de ruar a l meter a jir. No l'è stat tant sorì, me é fat didar mingol da Susanna e da Chiara de La Risola e ence dai bec de l'ofize de mie pare. Me é desciareà dute le planimetrie de la val, dute le foto da l'aut e dō da chest é deziidù sun che sciala l far e me é segnà dute le curve de livel e anter na linia e l'autra ge stasc n toch de lego. É realisà ence la piantina in 3D al computer."

Tant doventarèl gran a la fin l

plastich?

"É deziidù de l far con sciala 1:10.000, la misura de lego che duraron l'è 16x16 e per la basa duraron i Duplo, che l'è chi più gregn. L plastich l vegnarà spartì te sie toc per dō esser portà stroz, e donca luraron a gropes da 4. N toch l sarà gran 1,10 m per 83 cm e dut ensema vegnarà fora n plastich de 2,5 m x 3 e aut 30 o 40 cm più o manco."

Tenc de toc èste ordenà?

"En dut l'è 50 mille toc de color vert chiar per l pra, vert scur per l bosch, grisc scur per i monc, grisc mingol più chiar per i pajes e brun per l'aga e i Duplo i é enveze de duc i colores"

Olà ve troarede a l fèr?

"A Soraga e dapò l fassasse ence con l'idea de l portar stroz per duta la Val, no me é amò pissà olà, ma me saessa bel l portar fora per i comuns e ti posc olache duc i lo podesse veder."

La firma Lego te dèjela na man dal pont de veduda economic, ence per la reclam che ge farede?

"A esser sinzier sperae te n sostegn economic da man de chesta firma, ma la Lego l'ha chesta politica mingol senestra e no la sponsorisea chesta sort de scomenzadive, donca da chest vers La Risola e gio aon cognù se rangiar."

Colun él l'obietif de chest projet?

"L'obietif fosse no demò de far cognoscer Fascia e le Dolomiti a

più jent che l'è meso, ma ence n obietif didatich, percheche tras l laboratorie che vegnarà fat per meter ensema l plastich i bec arà l met de cognoscer miec l teritorie olache se vif, dapò se empararà che che l'è na planimetria e a durar chest metodo de costruzion che dapò l podarà vegnir durà ence te la vita. Dapò se starà ence duc ensema e speron de doventar n bel grop."

Telpai Ermanno, aeeste pajer de dir amò zeche?

"Ei, voleve dir che chest projet, no pa percheche l'è fat gio, ma l me sà enteressant e l pel esser de ùtol ence per smaorar l nonzech de la val. L'è ence mingol na endesfida."

Ge fajan de bie complimentenc a Ermanno; me vegnissa jà voa de me scrìver ite, e a voetres?

Intervista de Valentina Redolfi



Ermanno Zulian da Soraga ideator de "Dolomites Lego".

Gran suzess per "Istà per bec"

L'edizion de chest an de "Istà per bec" te la val de sora l'ha mudà organizazion e slarià fora l'ativitèdes en program



L grop di bec e de la bezes de "Istà per bec" 2011 ensema a sia maestres tedant a la scola populèra de Cianacei.

Sozieta - Segur i arede vedui passèr stroz per paise o su per n vièl da mont compagné da la maestres e duc bie alleges. Ence chest an, defat, ti meis de messèl e aost i bec da Mazin in ite i à l

met de tor pèrt a "Istà per bec", portà dant da l'assessorat al sozièl del Comun de Cianacei ensema a chi de Ciampedel e Mazin.

L program perveit semper l servije de trasport e de mensa per

i bec, con apede scomenzadives che tol ite desvaliva ativitèdes per duc i gusc e per duc i besegnes vardan al fin educatif e ence al divertiment sun nosc teritorie che l sporc na oferta de ativitèdes

n muie lèria. Ogne dì vegn fat zeche de spezièl per emparèr ativitèdes de grop che deide i bec a livel personèl e a stèr coi etres.

Chest an se à scrit ite 66 pìcoi dai 6 ai 11 egn e i é vidè da 5 maestres: Arianna Iori, Simonetta Iori, Martina Riz, Nadia Riz e Pamela Secci.

Ogne lunsch se va en "vacanza su la giacia" al stadie de Dèlba olache la insegnantes de l'Artistico Ghiaccio les endreza jèghes su la giacia e les ge ensema a stèr sui feres a chi che no é amò bogn. Da l'èga giacèda se passa a l'èga ciada del Lido de Termen, ajache la nodadoes de Cianacei e Pardac les é serèdes per lurier.

Semper te l'ambit sportif vegn fat ativitèdes te palestra de Cianacei e dapò l'è pervèdù ence n cors de rampinèda sul parei artifiziel con i istrutores fascegn.

La neva de chest an amò l'è l cors de Yoseikan Budo, endrezà con la sociazion sportiva Yoseikan Budo de Fiem e Fascia. Se trata de n program de alenament olache bec e bezes pel descorir sia potenzialitèdes sibie del fisich che

de la ment per emparèr a cognoscer miec se enstesc e esser bogn coscita de gestir e controlèr desvaliva situaziòn e emparèr a stèr ensema ai etres con respet e maor responsabilità.

Apede a l'ativitèdes sportives a sosta, ogne setemèna l'è pervèdù ben segur ence ativitèdes leèdes al studie ge fajan fèr i doveres dac da la scola per i meis da d'istà e ence ativitèdes outes a cognoscer miec l teritorie e la cultura ladina. Coscita i bec i à ence l met de tor pèrt a n muie de laboratorie didatich enjigné dal Museo Ladin de Fascia e amò l'è stat endrezà n cors con n educador ambientèl che, tras raides sul teritorie e laboratorie creatives, l ge farà cognoscer miec l bosch e ence la regoeta desferenzièda di refudames.

Chel de "Istà per bec" del 2011 l'è n program rich e specifich, fat jù delvers per ogne dì de la setemèna coscita da esser ùtol ence per la maestres. Segur per duc chisc 66 bec chest l'è n istà spezièl! (vr)